

**FITSARANA SY FIFIDIANANA**

**Tsy mitovy ny HCC sy ny Tribunal Administratif**

**N**y firenena repoblikana rehetra dia ahitana fahefana telo miavaka tsara dia ny fahefana mpanatante-raka, ny fahefana mpanaolalana ary ny fahefana mpitsara.  
Ho antsika eto Madagasikara ny fahefana mpanatanteraka dia ny Filohan'ny Repoblika sy ny fitondrampanjakana tarihan'ny Praministra no faratampony, ny Antanimiera roa tonta no fahefana mpanaolalana ary ny Fitsarana Avo momba ny Lalampnanorenana (HCC) dia ao amin'ny fahefana mpitsara.  
Mahakasika ny fahefana mpitsara no tiana asian-dresaka, raha teo amin'ny

tantarampirenena dia Filankevitra Ambony momba ny Andrimpanjakana no anarana nentin'ny fahefana mpanaolalana tamin'ny Repoblika voalohany, fa nanomboka tamin'ny Repoblika faharoa dia Fitsarana Avo momba ny Lalampnanorenana no anarana nosaloran'ny fahefana mpitsara.  
Ny azo ambara dia fitsarana manana endrika politika ny HCC, satria ireo mpikambana ao dia voatendry avy amin'ny resaka fizaran-toerana(quotas), avy any amin'ny andrimpanjakana samihafa, ary ireo voatendry ireo ihany koa dia tsy mpitsara akory ny sasany fa notendrena noho ny antony politika,

ohatra toa an'i Andriamatoa Mananjara tamin'ny fitondrana tetezamita tamin'ny 1992, Admnistrateur civil izy, kanefa dia Mpitsara avo no iantsoana azy ary ny ohatra akaiky indrindra sy tsy takona afenina dia Ingahy Jean Eric Rakotoarisoa, izay mpampianatra lahana teny amin'ny Oniversite fa tsy mpitsara velively kanefa dia voatendry ho mpitsara avo, dia nisy ny fifampifidianana teo amin'ny voatendry dia ilay tsy mpitsara no voafidy ho filoha.  
Fa ny "Tribunal administratif", na fitsarana misahana ny ady amin'ny fanjakana kosa dia mpahay lahana tena niofana ho

mpitsara no ao, ary nandalo ny fitsapana rehetra sahana ny mpitsara, noho izany dia azo antoka fa haneho ny fahefana maha-mpitsara azy izy ireo amin'ny fitsarana ny raharahampifidianana momba ny fifidianana ben'ny tanàna sy ny mpanolotsainan'ny tanàna, fa tsy sanatria hanao toy ireo tao amin'ny Fitsarana Avo momba ny Lalampnanorenana (HCC), izay efa niaraha-nahita ny nataony tamin'ny fifidianana filohampirenena sy solombavambahoaka, hita mibaribary fa fitsarana politika tsotra izao no nataony.

**Ny Valosoa**

**Fandriampahalemana tsy voafehy**

**Niraraka indray anefa ny Kintana**

Tamin'ny filankevitry ny ministra farany teo dia nisy indray ny fampiakarana ho jeneraly, maromaro ho ilay tsy mahay manisa. Niraradraraka indray arak'izany ny Kintana ao anivon'ny Foloa-lindahy Malagasy dia tao anivon'ny tafika sy ny zandarimariam-pirenena. Ireo tompon'andraikitra

ambony ao amin'ny tandroka aron'ny vozona, natao hiaro ny vahoaka sy ny fananany no nisiraka izao fahasoaana makadiry izao, ny tsikaritra aloha dia tsy voafehy ny fandriampahalemana manerana an'i Madagasikara, mandry andrivan'antsy ny vahoaka, tsy afamamokatra, ny hasaro-

tampiainana mamely, kanefa dia ny fampiakarana galona no nataon'ny fitondrana ho laharampahamehana.  
Fa ny mahatsikaiky dia ilay filazan-dRamatoa mpitondra tenin'ny fitondrampanjakana manao hoe: araka ny tolo-kevitra avy amin'ny ministry ny fiaravampirenena no na-

naovana ilay fizarana kintana, izany hoe nisy izany ny fanandrantantena tao nataon'ingahy ministra sy ny mpiara-miasa aminy akaiky, izay marihina fa tsy ilay kintana nandrandrain'ireo Magy akory ireo, fa kintana eny antso-roka ihany.

**Ny Valosoa**

**ORTM**

**Sarintsarina fifaninanana no natao anaronana fampidirana mpiasa zanaky ny havana sy ny namana**

Mitohy ary miha-mafy hatrany ny antsojany ataon'ny Minisitry ny Serasera sy ny kolontsaina (MSK) sy ny ekipany, amin'ireo mpiasampianjakana mampihodina ny Televiziona Malagasy. Raha tsiahivina dia niteraka resabe ny fandroahana mpiasa tsy ara-dalana tsy tsy ara-drarinny vantany vao mandray ny toerana i Ramatoa Minisitry Lalatiana Rakotondrazafy. Niakatra teo amin'ny « plateau » ny vaovao an-tsariny ny Televiziona Malagasy mihitsy ny tale jeneralan'ny Serasera, Fanahimana Tiaray nitondrany fanazavana petatoko nanontsanana ireo mpiasa noroahina. Nambarany fa fahadoana goavana sy fanevavatenana ny lehibe, na « insubordination » no nandroahana ireo mpiasan'ny tele sy radiompiarenana ireo. Toy izany ny fijoroana vavolombelona nataon'ny iray taminy ireo mpiasa voaroaka, izay antsointsika hoe Rivo : « Tamin'ny andiany voalohany ny hetsika « tagnamaro » nataon'ny Minisitry ny Serasera sy ny kolontsaina teny amin'ny Hopitalin'i Mahitsy no nitranga ny tantara. Noterena nanao izany avokoa ny mpiasa rehetra avy amin'ireo sampandraharahan'ny MSK. Nisy mihitsy ny fanamarinam-pahatongavana natao mialoha sy aorian'ny asa natao, na dia an-tsirapo azana no nolazaina fa hifanontanana amin'izany.» Marina tokoa ve fa nisotro zava-pisotro mahamamomianareo kanefa mbola teo ampanaovana ny tagnamaro ? Rivo : « Nozarazaraina isaky ny sampandraharahan'ny Ministery ireo asa

atao. Nanana ny anjara asa tandrify azy ny mpiasan'ny Kolontsaina, ny mpiasa birao isantsoakajiny ary ny mpiasa ao amin'ny TVM sy ny RNM. Koa satria maro ny mpiasa ao amin'ny haino amanjerim-panjakana dia vita mialoha ny anjara asa tandrify azy ireo. Nanomboka niala tsikelikely ireo mpiasa rehea nigadona ny tamin'ny 1 ora tolakan-dro. Teo ireo namonjy fodiana, nisy ihany koa ny mbola nijanona satria andro Sabotsy tamin'io, izany hoe andro tsy fiasana. Ireo tanora kosa dia nisafidy naka aina sy nanala hetaheta tao amin'ny toeram-pisotroana iray teny akai-kiny Hopitalin'i Mahitsy. Tetsy ankilany anefa dia mbola tsy nahavita ny anjara asany ny mpiasa avy amin'ny sampandraharaha hafa. Nisy tamin'ireto farany no nangaladia nitady zava-pisotro, ka nahita ireo mpiasan'ny TVM sy RNM tao amin'ny toeram-pisotroana, ka avy hatrany dia nanao tatitra tany amin-dRamatoa Minisitry. Vantany vao naheno ny tatitra i Ramatoa Minisitry dia nampiato ny asa nataony, ka niditra tao amin'ny « Bar », nivazava sy nandrangaranga sazy ho an'ireo mpiasa tratrany tao. Nisy ihany koa ny tanankavanany Minisitry no naka sary avy hatrany ireo mpiasa. » lanareo hono namalivaly ny Minisitry ? Rivo : « Tsy marina velively izany. Tsy nisy nahaloabava izahay sady raiki-tahotra noho ny fampitahorana fandroahana. » Rehefa nande tokoa ny ora sy ny andro dia namoaka naoty amin'ny fandroahana ireo

mpiasa ireo ny Minisitry tamin'ny alalan'ny Sekretera jeneraly. Mpiasa ECD avokoa izy ireo no voaroaka avy hatrany tsy misy fanazavana. Tsy voahaja ny zon'izy ireo satria tsy nisy akory ny fangataham-panazavana na « demande d'explication », izay dingana voalohany tokony harahana vao mirosy amin'ny fandroahana. Niakatra teny amin'ny filankevitry mpamoaka sazy na « Conseil de discipline » ny raharaha. Rehefa natao ny fifanatrehana teo amin'ny mpiasa sy ny tompon'andrikity ny Ministeran'ny Serasera sy ny kolontsaina dia nibaribary ny tsy fanarahandalana nataon'ny Minisitry sy ny ekipany tamin'ny fandroahana ireo mpiasa. Nanapaka ny mpitsara ny hamerenana tsy misy fe-petra amin'ny asany ireo mpiasa noroahina ireo. Mandrak'androany, mbola tsy nanatanteraka izany ny Minisitry sy ny Sekretera jeneraly, izay mieboebo manerana ny tanàna fa mpahay lahana « Juriste » nefa tsy mahay mampihatra ny lahana.  
Ankoatra ny fandroahana mpiasa amin'ny fomba tsy manara-dalana dia mambohy tontolo fampihorohoroana ao amin'ny haino amanjerim-panjakana ny Minisitry sy ireo mpanatanteraka ny baikony. Ventesina saika isan'andro amin'ny toeram-piasana ny hoe fandroahana mpiasa ECD hatramin'ny 50 isa sy fanaovana « affectation » ireo mpiasampianjakana tsy metimety amin'izy ireo. Raha ny mikasika ireo ECD izay misy efa niasa hatramin'ny 12

taona tao amin'ny TVM sy ny RNM dia nolazaina fa mandany vola satria maro loatra. Etsy ankilany anefa mikarakara fifaninanana « mipay talenta vao » ny Ministery hampidirana mpiasa vaovao ahitana mpanolotra vaovao sy mpanentana fandaharana ary teknisiana. Tanora vao ampiaranina ny asa, ary ny mpiasa ao amin'ny TVM sy RNM ihany no manofana azy ireo eny amin'ny CEFOM Ivato. Manahy mafy ny amin'ny ho avin'ity haino amanjerim-panjakana ity ireo mpiasa. Entina andrakofana ny fampidirana ireo zanaky ny avana sy ny namana fotsiny ihany fanaovana ny sarintsarina fifaninanana.  
Raha ny mikasika ny fimenenonon'ny mpifahiny sy mpijery noho ny haratsin'ny kalitaon'ny sary sy ny feo, indrindra mandritra ny fampitana mivantana ny lalao ara-panatanjahatena samihafa dia toy izao ny marina hoy ny teknisiana iray ao amin'ny TVM, izay antsointsika hoe Jery : « Miracle no mbola mampihodina io televiziona io. Ny fahaiza-manao sy ny traikefa ananan'ireo teknisiana tranainy amin'ny fampiasana ireo fitaovana efa ratsy sy tsy maharaka ny toetrandro intsony no mbola mampihodina azy. Nisy ihany ireo fitaovana raitra sy manaravenitra nampideraina sy nanaovana fandaharana manokana mihitsy ny fanolorana azy, saingy indrily fa efa tsy hita intsony izay nanjavonany. Angamba hisy hanokatra televiziona vaovao indray any ho any. »

**Ny Valosoa**

**Sakafo Ny Valosoa**



Korzety sy totonkena indray ny laoka amin'ny Sakafo eto amin'ny gazetinao androany. Mba hampatsiro azy : azo asiana frômazy vache qui rit rehefa manendy ilay totonkena dia hafangaro tsara, na frômazy rapé kely raha misy. Dia mazotoa homana tompoko.

**NY VALOSOA sy Mahaso**  
**Fomba natoraly hitsaboana ny aretin-tenda**

Fomba natoraly hitsaboana ny aretin-tenda indray no Mahaso eto amin'ny gazetinao androany. Tsy mifidy vanim-potoana ny aretin-tenda, ary isan'ny tena mampihetsika azy io amin'ny vanim-potoana mafana toa izao ny fihinanana zavatra mangatsiaka loatra: gilasy, ranomboankazo..., sy ireo voankazo manta.  
-RAVINA FREZY: mba hampitoniana ny aretin-tenda, dia sasana madio tsara ny ravina frezy singany enina, dia ampangotrahina amin'ny rano 1 litatra; ary atao very sasaka (very sasaka: ampangotrahina ka raha rano 1 litatra no nampiasaina dia lasa atsasa-litatra sisa izy vao esorina ambony afo), dia ampangatsiahana, ka rehefa mahazo ny hafanana faran'izay tantiny tena dia atao gararaka, atao maraina atoandro hariva mandram-pitonin'ny aretina, manakana ny fihavian'ny kohoka koa ny fanaovana izany.  
-TANTELY SY VOASARY MAKIRANA: voasary maki-rana eo amin'ny 2 hatramin'ny 3 isa no ampiasaina arakaraka ny habeny sy ny ranony, ka fihazana tsara dia esorina ny vaoniny, dia somary hafanaina kely avy eo, dia afangaro amin'ny tantely 2 na 3 sotre lehibe, ary azo ampiana menaka oliva kely iray sotre lehibe raha misy, hohanina izy vao vita iny,  
-DIPOAVATRA SY TONGOLO GASY: ampangotrahina ny rano tokony ho 25 cl eo ho eo, dia arotsaka ao anatiny ny voa-na dipoavatra miisa 20 isa eo ho eo rehefa voatoto tsara, sy hasina tongolo gasy voatoto miisa 2, avela hangotraka tsara mandritra ny 5 minitra, dia tavanina avy eo, sotroina, ka atao in-3 isan'andro ny fisotroana azy, tsara kokoa isaky ny hihinana vao karakaraina.

**NY VALOSOA sy Mahaliana**  
**Ny tanànan'Antsakoamanondro, distrikan'Ambanja, faritra Diana**

Ny tanànan'Antsakoamanondro, distrikan'Ambanja, faritra Diana indray no Mahaliana eto amin'ny gazetinao androany. Kaominina ambanivohitra ity tanàna ity. 56 m eo ny haavon'ity tanàna ity mihotra amin'ny ranomasina. Mpamboly sy mpiompy ny mponina any. Vokatry any Antsakoamanondro ny vary, ny kafe, ny voasary, ny mahabiby,...

